

DATE: 09/02/2008

Istilah 'anak angkat Pak Lah' bohong – Muhammad

Um - 9/2/2008



SANDAKAN 8 Feb. – Ada pihak mendakwa sebagai 'anak angkat' Perdana Menteri, Datuk Seri Abdullah Ahmad Badawi dan berkuasa menentukan calon-calon Barisan Nasional (BN) pada pilihan raya umum akan datang.

Ketua Penerangan UMNO, Tan Sri Muhammad Muhd. Taib (**gambar**) ketika mendedahkan perkara itu berkata, istilah 'anak angkat Pak Lah' adalah bohong dan sengaja direka untuk kepentingan politik sendiri.

Sehubungan itu beliau meminta supaya ahli UMNO tidak terpengaruh dengan dakwaan pihak tertentu yang kononnya diberi kepercayaan

menentukan calon bagi sesuatu kawasan pilihan raya.

Jelasnya, Abdullah yang juga Presiden UMNO tidak pernah melantik individu tertentu menjadi anak angkatnya bagi menentukan calon-calon parti.

"Semua ini dusta, Perdana Menteri ada sumber yang paling kuat dan sudah tentu saluran yang sedia ada, cukup kuat untuk menjadi sumber beliau.

"Tiada istilah anak-anak angkat, semua ini tidak benar dan bohong semata-mata," katanya kepada pemberita selepas memberikan penerangan mengenai isu-isu semasa di Dewan Masyarakat Sandakan di

sini hari ini.

Beliau mengulas dakwaan pihak tertentu yang kononnya diberi kuasa menentukan calon yang layak untuk dikemukakan bertanding pada pilihan raya akan datang.

Muhammad berkata, calon-calon yang dipilih daripada UMNO adalah berdasarkan laporan daripada sumber yang telus dan kaedah tertentu serta tidak sesekali berdasarkan pemilihan daripada mereka yang mendakwa sebagai anak angkat.

Katanya, individu yang mendakwa sebagai anak angkat itu hanya cuba mencari kesempatan melalui beberapa bukti seperti bergambar dengan Perdana Menteri atau du-

duk bersebelahan dengan beliau.

"Perdana Menteri ini baik pada semua orang, tetapi kebaikan ini digunakan segelintir individu untuk mengambil kesempatan pula," katanya.

Penerangan yang disampaikan oleh Muhammad itu melibatkan UMNO bahagian Sandakan, Kinabatangan, Beluran, Batu Sapi dan Libaran.

Hadir sama pada majlis itu ialah Ketua Penerangan UMNO Sabah, Datuk Sapawi Ahmad; Ketua UMNO Bahagian Sandakan, Datuk Ampong Puyon dan Ketua UMNO Bahagian Kinabatangan, Datuk Bung Moktar Radin.